



## Vita de ploania y de paisc

- **Rengraziamont:** l'Uniun dles Eres dij de cör iolan a düc chi co a tut pert ala "Domegna dla jopa". I án podü mené demez 250,00 € por "Familien in Not".
- **Sorvidús:** por en Pasca periunse endô der bel do val' üs por nüsc ministranc y nostes ministrantes. Der bel iolan!
- **Mostra en segno de to amur:** la "Südtiroler Krebshilfe" met da jí en Pasca do la gran messa l'aziun „**Na resa por la vita - daidé por daidé**“. Por Osc segno de solidarité Ves dijunse belo danfora bel iolan y Ves aodun na Bona Pasca!



## enformaziuns y termins

**Velia de Pasca:** le Grup Decanal, adöm a düc i grups dai jogn dla Val Badia, invëia düc ala Velia de Pasca en Jöbia Santa, ai 18 d'aorí ales 22.00 tla dljia da Oies.

**Iade da Padre Pio:** al ven pié ia tla Val Badia la sabeda ai 27 d'aorí ales 04 da doman da Corvara demez, por jí a San Giovanni Rotondo, olá che an stará cina en dedolönesc ai 30 d'aorí. Por informaziuns y prenotaziuns, ☎0474 520013.

**Marcé:** l'Uniun dai Ei da Lungiarü met a jí n marcé de patüc de secunda man por mituns, la domegna ai 28 d'aorí dales 9:00 ales 15:30 te palestra a Lungiarü. Chi co á val da vene pó se prenoté cina ai 20 d'aorí pa ☎ 340 3242376 (18:00 -21:00) o pa ☎ 380 5145840 (10:00 – 13:00). Düc é bel enviés!

**Conzert:** le Cor Kyrios y le Vinzenter Knabenchor envieia a so conzert en domegna ai 14 d'aorí ales 18.00 tal Vinzentinum y en dedemesaledema a 17 d'aorí ales 20:00 te Ciasa dla Cultura a La Ila.

**ASC Mareo/1:** en lönesc ai 29 d'aorí ales 20:00 te salf dla Raika vegnel fat la sontada generala dal ASC Mareo. Düc i enteressés é der bel envies a to pert.

**Comun de Mareo/1:** al ven lascé alessi che le zenter de reziclaje "Ciamaor" sará slüt en Vendres Sanc ai 19 d'aorí y en dedemesaledema ai 1 de ma.

**Comun de Mareo/2:** en sabeda ai 9 de ma vegnel organisé da pert dal Comitê dai Jogn dal Comun n **de dla natöra**, olá ch'an jará a cheie sö ciomont co é ciamó anentoronn ia por tera. An s'encunta ales 9:00 a Al Plan dan paiun olá che al gnará fat i grups y partí sö les zones. Gran y pici é der bel envies da to pert y vignönn dess se tó do maneces y/o pinzes da cheie sö le ciomont, sac ven motüs a disposiziun da pert dal Comune. Ales 12:00 vegnel organisé da pert dl'azienda turistica danló da paiun na marena por düc chi co á fat empara.

<b>Döt le bun a:</b>		
Elena Maria Daverda ved. Ellecosta	*	14.04.1937
nosc Papa emerité Benedet XVI.	*	16.04.1927
Florian Ellecosta	*	19.04.1938
Ludwig Willeit	*	20.04.1937
Irma Feichter, <i>Santa Cristina</i>	*	20.04.1944
signor Iaco Ploner, <i>San Martin</i>	*	22.04.1944
y a düc chi co á santennom y complesc i agn cöst'edema		

**Impressum:** Ploania d'La Pli; redaziun Franz Rigo y Edith Willeit  
**Comunicaziuns cina le dedemesaledema** sera a Franz Rigo: ☎ 0474 500978 o ✉ ploania@gmx.net  
**Download plata:** www.unitepastorala.org



# Plata dla Ploania

## La Pli de Mareo

### Santa Maria dal Bun Consei

Ploan: Signor Heinrich Perathoner  
 E-mail: ploania@gmx.net

Calogna Al Plan: 0474 501006  
 Radio de Ploania: 93,00 MhZ

UNITÉ PASTORALA



**VAL BADIA**  
 www.unitepastorala.org

Ann C

14.04.2019 - Domegna dal orí  
**FESTA DAL INGRES DE GEJÚ A IERÚSALEM**

n. 20

## Benedí sides le re co ven tal ennom dal Signur!

☞ Lc 19, 28–40 | Is 50, 4–7 | Fil 2, 6–11 | Lc 22, 14 – 23, 56

### Dal Vangelo do San Lúca (19, 28–40):

Te chel tomp <sup>28</sup>é Gejú jü sö cuntra Ierúsalem. <sup>29</sup>Canch'al ea roé dlungia Bétfaghe y Betánia sön che munt ch'an ti dij Munt dal Orí, ál ortié dui discepui danfora <sup>30</sup>y ti á dit: Jide tal paisc che é dan nos. Canch'i roeis ete, ciafareise n müsc jonn taché sön chel ch'al n'é ciamó sté degügn che s'á sonté. Destachédele, y condejédele adalerch! <sup>31</sup>Y sce zacai ves damana: Ciodi le destacheise pa?, spo respognede: Le Signur l'adora. <sup>32</sup>I dui é piá ia y á urté döt desch'al ti á dit. <sup>33</sup>Canch'ai á destaché le polerin, ti á i patrums dit: Ciodi destacheise pa le müsc? <sup>34</sup>Ai ti á respognü: Le Signur l'adora. <sup>35</sup>Spo á condüt le müsc jonn da Gejú, á motü sü guanc sön le tier y á daidé sö Gejú. <sup>36</sup>Dertan ch'al raitá ennant, destenea i discepui sü guanc ia por strada. <sup>37</sup>Canch'al ea roé tal post olache le tru va dala Munt dal Orí jö pert, á düc i discepui motü man dala ligreza da laldé dadalt Idio por dötes les opres miracoloses ch'ai á odü. <sup>38</sup>Ai scraia: Benedí sides le re co ven tal ennom dal Signur. Pêsc tal ci y gloria sö alalt! <sup>39</sup>Danló ti á scraie pomez valgügn farisês fora dla meja: Maester, met a scuté tû discepui! <sup>40</sup>Al á respognü: I ves diji: Sce chisc scuta, sarál les peres che scraia.

### Oraziun dal de

*Periun! Dio onipotent y etern, olghenn a töa orenté, é nosc Redentur diventé porsona umana; al s'á arbassé y s'á umilié sot l'infamia dla crusc. Deidesse da ti jí do söle tru de söa pasciun, por podei tó pert a söa ressozeziun. Do cösc te periunse por el, Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.*

### Vire la Carsema

Lc 19, 28–40

Ciodi ...? Le Signur l'adora.

### Impuls

*Se afidunse plenamonter tal Signur, por odei le bel da vire la fede?  
 I toli pert ales funziuns d'edema santa*

☞ Letöres dla GRAN FESTA DE PASCA:

St.Ap 10, 34a.37–43 | Col 3, 1–4 | 1 Cor 5, 6b–8 | Jan 20, 1–18

EDEMA SANTA 14.04. - 21.04.2019

<b>DOM 14.</b>	<b>Domegna dal orí</b> <b>FESTA DAL INGRES DE GEJÚ A IERÚSALEM</b>	Valerian, Lidwina, Erna
<b>08:30</b>	<b>benedisciun</b> dal belorí jö dal paiun, <b>prozesciun</b> te dlijia, <b>gran messa</b> por döta la ploania con la Pasciun do San Lüca	
<b>Lön 15.</b>	<b>dl'edema santa</b>   Hunna, Damian	
<b>→</b>	<b>de d'oraziun personala y te familia</b>	
<b>Ded 16.</b>	<b>dl'edema santa</b>   Bernardette Soubirous, Benedikt Josef Labre	
<b>07:30</b>	<b>s.m.</b> por † Paola Brandlechner, Gosser <b>s.m.</b> por † Maria Brandlechner ved. Morlang, Mischí	
<b>Dem 17.</b>	<b>dl'edema santa</b>   Eberhard, Rudolf, Max Josef	
<b>→ 14:30</b>	<b>preparaziun y pissia da Pasca dai scolari dla scora mesana</b>	
<b>→ 19:30</b>	<b>les Staziuns con l'Uniun dai Ei</b>	
<b>Jöb 18.</b>	<b>JÖBIA SANTA</b>   Aya, Sabina, Alexander	
<b>→ 19:30</b>	<b>s.m. dl'Ultima Cena</b> de ringraziamont por l'Eucaristia y le Sazerdoze, por †† prei sig. Merch Graffonara, sig. Matio Rigo, sig. Heinrich Videsott <b>s.m.</b> en onú y rengraziamont dai Angeli Custodi <span style="float:right">♪ Cor</span> <b>adoraziun dal SS. Sacramont</b> tla „Fossa Santa“, velia con la Joneza y poscibilité d'adoraziun personala y chita cina les 22:00	
<b>Ven 19.</b>	<b>VENDRES SANC</b>   Werner, Friedrich	<b>jain y astinonza dla cern</b>
<b>→ 15:00</b>	<b>liturgia dal Vendres Sanc</b> con la Pasciun do San Jan, veneraziun dla Santa Crusc, funziun dla Comegnun <span style="float:right">→ <b>offerta de Carsema</b></span>	
<b>Sab 20.</b>	<b>SABEDA SANTA</b>   Hildegund, Odette, Wilhelm	
<b>→ 20:00</b>	<b>funziuns dla Net de Pasca:</b> benedisciun dal fù y dal cere, “Exultet”, liturgia dla Parora, <b>s.m.</b> ciantada por benefaturs vis y defonti <b>s.m.</b> por vis y defonti dla fam. Tone y Clara Frontull, Mareo benedisciun dal'ega y renovamont dles empormetüdes dal Bato ♪ Max Filke, „Missa in G“	
<b>DOM 21.</b>	<b>GRAN FESTA DE PASCA</b> Anselm da Canterbury, Konrad da Parzham	
<b>08:30</b>	salüde ala festa, “Vidi aquam”, <b>gran messa</b> ciantada solena por döta la ploania, benedisciun dal signé, <span style="float:right"><b>offerta por la ploania</b></span> ♪ W.A. Mozart, Missa in C „Orgelsolomesse“ KV 259	
<b>→ 14:30</b>	<b>espi da festa y benedisciun eucaristica</b>	
<b>ampola:</b>	por fam. Trebo, Bolser	
<b>ministronc:</b>	▶ da doman y domegna: Daniel y Manuel ▶ da sera y domegna: Noemi y Maria	
<b>i recordun:</b>	Magdalena Palfrader, Eyrs	+ 20.04.2011



Le meterman de na storia nea (Lc 22, 14 – 23, 56)

**I ponsi do**

La letöra dla  
pasciun y mort de  
Gejú nes condüj  
tl'Edema Santa.  
Ara pö la fin de cösc  
Messia nö, mo i sán  
ch'al é le meterman  
de na storia nea  
d'umanité.  
I orun arjigné ca  
nösc cör y  
acompañé Gejú  
te sü momonc plü  
dramatics de söa  
vita.  
Spo podarunse  
ince goder la  
ligreza de söa  
ressoreziun.

**I preii ensciö**

**Encö** scraia la jont “Benedí é chel co ven tal ennom  
dal Signur!”,  
**endoman**, Gejú, sarál les medemes porsones co te  
condana a mort.  
**Encö** destenunse fora mantí canche te passes,  
**endoman** te fajunse jí sö por na strada de söus y  
sanch.  
**Encö** fajunse festa con te,  
**endoman** te coienarunse al t'odei mazé söla crusc.  
Tan falc y tan püch consequenc ch'i sun, Signur!  
Ta vas te Ierúsalem con triumf y gloria desco n re y te  
sas che te gnarás mazé söla crusc desco n loter y n  
malfatur.  
I podun ma amiré to coraji y proé da capí che cösc é  
porté da n amur ciamó plü gran.  
Nos podun ma te acompañé te cösta storia de dolur  
y de mort y te perié ciamó en iade con gran umilté:  
ais pieté de nos piciaús. Scínchesse la ligreza da tó  
pert a töa vita.

**JÖBIA SANTA** - Vangelo do Jan 13,1-15

“**Tan gonot ch'i mangeis de cösc pan y ch'i boeis fora de cösc caresc,**  
**encundeise la mort dal Signur cina ch'al ven**”, dij l'apostul Paul.

En cösta sera recordunse l'ultimo past de Gejú con sü amisc. Cösc past nes ál  
racomané da tigní desco festa, y ti laenn i pîsc nes ál lascé n ejompl desch'i  
desson encunté i atri.

**VENDRES SANC** - Vangelo do Jan 18,1-19,42

**Mo ai scraia: Metele söla crusc, metele söla crusc!**

La liturgia dal Vendres Sanc met man tal chît y se röa tal chît, deache ci co é  
sozedü da laota encá tla storia dal monn cina encö danter nos nes lascia gonot  
zonza parores. Embaní, tralascé, descredité, desconesciü, martorjé y enultima  
copé, cöstes é les ultimes ores de chel chescian, tres chel che Idio nes á mostré  
so amur.

**SABEDA SANTA** Vangelo do Lüca 24,1-12

**Al n'é nia atló, al é ressorí. ...**

Tla net scöra do la mort de Gejú, mo ince tla net de nostes temes y meseries,  
lomina ete le fù de Pasca. Pa cösc fù vegnel empié la ciandera da Pasca y  
condüta ete tla dlijia scöra: Gejú ressorí, la löm dal monn, lomina ince te nosc scür.  
Lominus, ega, vita y le pan rumpí é i segns de cösta Net Santa.